

Asociacion di Musiconan y Artistanan Aruba (AMAA):

Rapport pa trece union bou musiconan a keda presenta

MINISTER encarga cu Asuntonan di Cultura, a reuni diasabra atardi cu un grupo grandi di musiconan, na unda a presenta e contenido y conclusion di e rapport pa organisa musico y artistanan na Aruba.

Despues di un estudio haci pa expertonan nombra den un triumverato, Gobierno a ricibi e Consejo triumviraat 2016 for di man di e miembronan Edwin Tromp, Robert Jeandor, Edwina Werleman, Glen Penniston y Robert Maduro. Den consejo di Minister a aproba e Consejo di triumviraat 2016 aki unda awor a yega e momento pa pone den practica.

Diasabra cu un grupo interesa di musiconan a cera conoci cu AMAA cu ta e Asociacion di Musiconan y Artistanan Aruba. E rapport aki tabata necesario, e mandatario a splica, pasobra tabatin mester di un acercamento integral di musiconan aki na Aruba. No ta importante cu e rapport ta bisa cu mester tin un asociacion, pero mas importante ta loke mester ta contenido di e asociacion aki. Ehecucion di e rapport aki, e Minister Oduber a bisa, lo percura p’e musiconan haya nan balor, mas ainda debi na e trabou duro cu cada un musico ta eherce den e mundo di awendia.

Como Minister di Cultura, e mandatario a bisa esnan presente, e mester wak tur e tempo cu musiconan ta hinca den proyectonan grandi internacional y pa nan haya e debido reconocimiento pa esakinan. Mas ainda pasobra hopi biaha e musiconan no ta haya e reconocimiento financiero adecuado y no tin e recursonan pa haci mas cu nan produccionnan.

“Hopi biaha nos hendenan ta brasa e artistanan internacional y ta simplemente klap man pa esnan local,” Oduber a trece

dilanti.

P’esey e ta kere den un asociacion nobo cu lo trece e union cu ta buscando.

Pero asina mes e ta kere cu mester wak atras y siña di erornan cu a wordo cometi den pasado y evita esakinan den futuro.

“Si nos kier vence, bira grandi y bira conoci, nos mester brasa otro. Nos mester manda un señal hopi cla na comunidad cu mester sostene nos musiconan.

Nos musiconan mester por haya number 1, 2 y 3 rib’e topnan di tur siman na Aruba pa di eynan nos por wordo reconoci internacionalmente.

Ademas di e reconocimiento p’e musiconan, tambe ta importante e apoyo di Gobierno y e Ministernan. Esaki pasobra biaha no tabatin un maneho, cu e ta spera cu e por logra awor si. No solamente di su Ministerio, pero p. e. e maneho di trabou pa cu proteccion di e musico como trahado, di asuntonan economico p’e proteccion di e produccion di e musiconan.

Pero tambe cerca e Minister di Integracion, cu ta esun cu ta firma pa artistanan di afo bini Aruba. Sin un maneho coherente entre e Ministernan, no ta logra e union ni e reconocimiento cu kier logra cerca e musiconan.

Si tin un union bou di e musiconan den un asociacion, por logra e respet necesario pa e trabou di musico.

E mandatario a expresa di ta contento di mira un variacion di musico di diferente genero presente den e encuentro unda cu a papia di contenido di e rapport. El a gradici di triumverato cu el a instala cu a traha rib’e rapport cu lo mester ta e guia pa trece e union asina busca bou di e musiconan di Aruba.

Ya expresa na e musiconan cu nan tin tur su apoyo y e tin confiansa cu e trabou cu e asociacion lo sigui haci na bienestar di e grupo aki.

